

摘藻堂四庫全書薈要

集部

欽定四庫全書薈要

集部

御選元詩卷五

詳校官原任事

臣

李斯咏

欽定四庫全書薈要卷一萬八千四百十七

集部

御選元詩卷五

樂府歌行四

許謙

放權行

安溪湖平行權多黃頭豎兒倚權歌梅花照眼送寒色
酒暈著臉生春和炎涼世態翻覆手江水長靜風吹波
出門一笑天萬里白鷗浩蕩如吾何

陳樵

出塞曲

為戍潼關
李總管賦

屬鏤夜啼光屬地將軍一出櫓槍死行塵不動人歸市
帶甲如雲自天至取君甲兵為君洗分明袖有銀河水
手中遺下泥丸不封函谷封泰山

夜闌曲

碧宇星回夜漫漫靈蕪煙煖重熏薦冷翠香銷青桂枝
冰荷蓋光光遶帷花樓豔舞金菱蕤吳羹蜀酒精瓊糜

酒闌半解龍綃衣春朝曲渚聞鷓鴣

海人謠

海南蠻奴髮垂耳朝朝采寶丹涯裏夜光盈尺出飛魚
柏葉收珠寒蕊蕊幽箔連錢生綠花切玉蠻刀如切水
九譯來朝萬里天北風不動琅玕死

東飛伯勞西飛燕題飛花亭

東飛伯勞西飛燕花光絮影從風轉蜂黃蝶粉照靈葩
不散明珠祇散花霑衣隨袂花如雨羽人化蝶隨花去

與人下顧笑春紅春閨一昔生秋容骨齊熊耳君知否
花豔春暉不經久羽衣一拂千萬春春花隨蕊齊崑崙

虞美人草詞

美人不願顏如花願為霜草逢春華漢壁楚歌連夜起
騅不逝兮奈爾何鴻門劒戟帳下舞美人忍淚聽楚歌
楚歌入漢美人死不見宮中有人疑

七夕宮詞

內人拜月金鋪戶鳳宿梧枝秋葉下露華入袂玉階寒

織署錦工催祭杼月下金鈿照骨明同心絲繪紅生縷
素瓜碧寶上華樓夜闌飈馭下銀州

石溪歌

為石漢和尚作

石溪一滴水本自明河來明河倒瀉箕尾溼千里萬里
喧風雷小龍挾向雲間過水滑瓢欵誤傾隨蒼崖一息
裂清泉似是巨靈新擘破南州衲子天下奇夜撐鐵笛
欲渡之珠船照耀明月冷赤手拾得珊瑚枝又復揚舲
向東去直到衆流歸一處東方火發海影紅金鳥飛上

扶桑曙

丁復

寶鴨曲

銅池織風翠波躍睡足暖煙飢不啜重簾未厭雲水姿
華屋清深寄閒絕生味剥花紅錦翅枯咽半濕薔薇水
寶燈夜縣瑠璃光恍若澹在滄浪裏方筵慢舞得嬌饒
指痕膩染羅紋細就中恐有絕纓人誤識韓郎衣上氣
古間烏化之言豈虛語願學飛仙作雙去

月灣釣者歌

月灣釣者天與閒長日釣魚明月灣黃昏坐到月上山
天低月高人未還月圓在天半在水明月灣頭人所喜
先生月灣家密邇坐釣明月那可已波神起笑弄明月
月滿波心魚撥刺柔緡搖月寒餌沒爛月錦鱗魚上出
得魚叩月喚鄰家煮魚和月吞香霞舉杯月來金滿花
酒光蕩月天無涯杯痕倒瀉月入腹月興惱人清不足
杯空仰天月照目顧影翻憐月孤獨夜深月冷霜滿天

勸月不飲月乃延置杯餽月坐月前月謂汝飲天之緣
呼童就月即更酌月故憐人月不落月在憂來無處著
但恐尊空月相却豈不知曹老瞞明月可掇憂無端豈
不聞嚴家灘漢月不滿羊裘寒非熊辭月就西伯夜夜
渭川空月白來如明月灣頭客釣月取魚賒酒喫忽自
笑把酒問月者何如古人今人月在諸金尊照月長不
虛胡為捉月騎鯨魚青溪好月連江湖迴環九曲月若
鋪我今亦願為月灣釣者徒磯頭展席為月沽酒後耳

熱醉舞明月歌鳴鳴

次韻西湖竹枝歌三首

上塘楊柳下塘陰阿郎愛人不愛金塘水西流東入海
水深不似阿儂深

柳葉如眉枝似腰贈郎輒挽最長條條長即與儂心遠
不是為儂春態嬌

錢唐潮來兩岸平錢唐潮落江月明錢唐女子新樓閣
夜半吹簫鸞鳳鳴

王虎臣

縑絲行

輸班輪機旋若風吳姬拮据無好容神蠶遭烹不自悔
以死利世功無窮當空一縷如抽雪宛轉縈紆無斷絕
誰知中有長恨端心事從今為君說車聲愈急絲愈永
比妾愁腸猶易盡去年絲成盡入官弊衣不足常辛寒
今年蠶留猶在紙已向豪家借倉米探湯拾緒手欲爛
辛苦無人慰憔悴生平自知妾命薄詎忍將愁訴夫壻

吳綾蜀錦多光輝明朝已上他人機

汪鏊

戍婦詞四首

兩地魂消萬里愁君猶荒戍妾空樓去時勲業無情鏡
留與歸人照白頭

象尺金刀對玉缸團花裁破鷓鴣雙沙場爭信深閨夜
忍淚縫衣月滿窗

嬋娟霜月照荒垣妾擁重衾尚怯單況是玉門關外雪

夜深沙漠鐵衣寒

塞邊無鴈可傳書
門外無山可望夫
獨有柳營千里月
素娥深夜伴人孤

薩都拉

白翎雀

淒淒幽雀雙白翎
飛飛只傍烏桓城
平沙無樹巢弗營
雌雄為樂相和鳴
君不見舊日輕盈舞
紫燕鴛鴦鎖老
昭陽殿風暄芍藥春
可憐露冷芙蓉秋
莫怨

燕姬曲

燕京女兒十六七，顏如花，紅眼如漆，蘭香滿路，馬塵飛。
翠袖籠鞭，嬌欲滴，春風淡蕩，搖春心，錦箏銀燭，高堂深。
繡衾不暖，錦鴛夢，紫簾垂，霧天沈沈，芳年誰惜，去如水。
春困著人倦，梳洗夜來，小雨潤天街，滿院楊花飛不起。

吳姬曲

皎皎紅羅幕，高高碧雲樓，娟娟一美人，炯炯露雙眸，郎
居柳浦頭，妾住鶴沙尾，好風吹花來，同泛春江水。

洞房曲和劉致中員外作

峭寒暗襲雲藍綺
蛟帳悵悵夜如水
美人骨醉紅玉軟
滿眼春酣不忺起
幽禽關關喚霜曙
金屏屠蘇溢香霧
有生只合老溫柔
璧月長教挂瑤樹
鴛鴦同心暗中結
滿意芳蘭暖紅雪
癡雲駭雨自年年
不管人間有離別

江南樂

江南樂春水紅橋滿城郭
出門不用金馬絡
門前畫船如畫閣
綠紗虛窗春霧薄
隔窗蛾眉秋水活
翡翠冠高

羅袖閨楚舞吳歌勸郎酌紫竹瑤絲相間作船頭柳花
如雪落船尾翠旗風綽綽秉燭夜遊隨處泊人生無如
江南樂

江南怨

江南怨生男遠遊生女賤十三畫得蛾眉成十五新妝
識郎面識郎一面思猶淺千金買官遊不轉儂家水田
跨州縣大船小船過淮甸買官未得不肯歸不惜韶華
去如箭楊花撲簷飛語燕疎雨梧桐閉深院人生無如

江南怨

漢宮早春曲

女夷鼓吹招搖東羲和馭日騎蒼龍金環寶勝曉翠濃
梅花飛入壽陽宮壽陽宮中鎖香霧滿面春風吹不去
鞭却靈鼇駕五山芙蓉夜暖光闌干鷄人一唱曉星起
四野天開春萬里

王孫曲

內家楚楚諸王孫白馬金鞍耀晴日尊前細樂耳厭聞

世上閒愁生不識宮袍裁成五色雲珍珠簇就雙龍紋
衣裳光彩照暮春紅靴著地輕無塵翠樓珠箔玉鈎挂
腸斷宮腰無一把海棠花下畫聞鶯太液池邊春洗馬
千枝萬枝桃杏紅花枝飄香薰酒中歸來月落酒未醒
有詔早入明光宮

蘭皋曲

溪水長涵幽草芳春溪露滴蘭葉光美人日暮采蘭去
風吹露濕芙蓉裳芙蓉為裳蘭結珮玉立亭亭臨水際

天寒袖薄人不知疎雨蘭苔鳴翡翠幽蘭日日吹古香
美人不來溪水長

新夏曲

紅泣香枯怨流水夜放籜龍千尺尾風生宮樹曉層層
涼綠一簾收不起煙乾寶鴨白晝清祝融緩轡行且停
薔薇花深霧冥冥碧窗睡起香滿肱

芙蓉曲

秋江渺渺芙蓉芳秋江女兒將斷腸絳袍春淺護雲暖

翠袖日暮迎風涼
鯉魚吹浪江波白
霜落洞庭飛木葉
盪舟何處采蓮人
愛惜芙蓉好顏色

梳頭樂府

紅綃捲袖搖劒聲
摩挲睡眼窺秋菱
陽臺夢斷不知處
一片烏雲愁欲傾
一鈎新月掀雲起
月漸低流麻草地
玉纖盤轉戲龍形
寶釵壓定飛鴉翅
撩春撥曉誇自然
黃金雙燕珍珠蟬
白頭老嫗低低笑
不覺婆婆二八年

蕊珠曲

笑城裏白玉樓冰簾倒挂珊瑚鈎玉人晏坐太清室
蛾眉不鎖人間愁彩橋東畔楊花轉飛入三天紫清殿
仙裳日暖藕絲香燕語鶯啼動幽怨天風泠泠吹珮環
霞冠不整偏雲鬢蕭郎風骨何可得紫簫赤鳳遊雲間
瑤臺午夜霜華瑩羅襪生寒冰一寸錦屏甲帳蕊珠新
雲房火鼎丹芽嫩天台仙子淡淡妝桃花洞口逢劉郎
巫山神女弄雲雨人去楚臺空斷腸步虛聲斷闌干外
春去秋來顏色改東風吹老碧桃花深院無人夜如海

相逢行贈別舊友治將軍

并序

予遷官出閩舟行抵興田驛二十里許俄聞擊鳴
金鼓應響山谷間隨見旌旗導前兵卒衛後中有
乘馬者毳袍帕首徐行按轡屢目吾舟吾病久氣
餒不能無懼心也頃之興田驛吏以行輿見迓遂
舍舟乘輿嚮之旌旗兵卒移導輿前馬從輿後輿
行馬鳴途中未敢交一語迫暮至邸舍燭光之下
毳袍者進曰某乃建之五夫巡簡官聞使君至候

此將一月矣某嘗三識使君面自都門一別今已
五載使君豈遺忘之邪僕驚謝曰將軍何人也荅
曰某即使君舊友雲中也熟視久之恍如夢寐雲
中復能紀余闕下丰采時否邪歷歷關河舊遊如
隔世乃對燭光夜道故舊明日復同遊武夷九曲
煮茶酌酒臨流賦詩出入丹崖碧嶂間心與境會
天趣妙發長歌劇飲相與為樂酒闌興盡秋風淒
淒落木雨下閩關在望復作遠行予始見君而懼

次得君而喜終會君而樂又得名山水以發揮久
別抑鬱之懷樂甚而復別別而復悲悲復繼之以
思也嗟夫人生聚散信如浮雲地北天南會有相
見因賦詩復為相逢行以送之

一年相逢在京口笑解吳鉤換新酒城南桃花正開
白面青衫鞭馬走一年相逢白下門短衣窄袖呼郎君
朝馳燕趙暮吳楚逸氣自覺凌青雲一年相逢在闕下
東家蹇驢日相假有如臣甫去朝天泥滑沙堤不敢打

都門一別今五年今年相逢滄海邊千山木葉下如雨
鴈聲隨地秋連天將軍毳袍腰羽箭擁馬旌旗照溪面
小官不識將軍誰臥病孤舟強相見豈知此地逢故人
摩挲老眼開層雲舊遊歷歷似隔世夜雨豈不思同羣
郎君別後瘦如許無乃從前作詩苦溪頭月落山館深
翦燭猶疑夢中語人生聚散亦有時且與將軍遊武夷
弓刀挂在洞前樹洞裏仙童來覓詩稽首武夷君借我
幔峰頂分我紫霞漿與子連夜飲左手招子喬右手招

飛瓊舉觴星月下聽吹雙鳳笙我酌一杯酒持勸天上
月勸爾常照人相逢莫向關山照離別鳳笙換曲曲未
終天風木杪吹晨鐘拂衣罷宴下山去又隔雲山千萬
重

練湖曲

練湖七月涼雨通白水蕩蕩芙蓉紅芙蓉紅盡早霜下
鴛鴦飛去何匆匆茜塘女兒弄輕碧鳴榔聲斷無消息
清波小藻出銀魚落日吳山秋欲滴望湖樓上雲茫茫

鳥飛不盡青天長丹陽使者坐白日小吏開鬢宮酒香
倚闌半醉風吹醒萬頃湖光落天影挂冠何日老江南
短褐綸巾上漁艇

終南進士行和李五峰題馬麟畫鍾馗圖

老日無光霹靂死玉殿咻咻叫陰鬼赤脚行天踏龍尾
偷得紅蓮出秋水終南進士髮指冠綠袍束帶烏靴寬
赤口淋漓吞鬼肝銅聲剝剝秋風酸大鬼跳梁小鬼哭
豬龍飢嚼黃金屋至今怒氣猶未消髯戟參差努雙目

桃源行題趙仲穆畫

長城遠築阿房起黔首驅除若螻蟻誰知別有小乾坤
藏在桃花白雲裏桃花重重間白雲洞門鎖住千年春
男耕女織作生業版籍不是秦家民桑麻鷄犬村村屋
流水門牆映花竹無端漁父綠蓑衣帶得黃塵入幽谷
主人迎客坐茅堂共話山中日月長但見花開又花落
豈知世上誰興亡明朝漁父歸城市回首雲山若千里
再來何處覓仙蹤恨滿桃花一溪水

戲贈王本中柳枝詞

日高燕語捲簾遲，獨倚東風看柳枝。
三月柳花飛欲盡，遠人涼露未歸時。

鞦韆謠

寒梅零落春雪灑，蕭娘腰瘦無一把。
澹黃楊柳未成陰，何人已繫青驄馬。
畫樓深處迎春歸，鞦韆影裏紅杏肥。
濛濛花氣濕人面，東風吹冷輕羅衣。
衣上粉珠流不歇，暗解翠裙花下摺。
殷勤莫遣燕子知，會向人間報風月。

補闕歌

錢塘三日風雨急古銅夜光飛霹靂是知神物出人間
猶帶吳宮土花碧玉橋素練懸銀河支機女兒飛鳳梭
蝦鬚風軟亂纖影春水日晴生潮波破窗冷硯留不得
零落江南酒家客狂歌索酒仰面歎誤擊紅籌唾壺裂
何人進入蓬萊宮銀屏碧幕珠簾重此生補闕亦何用
玉龍瀉水流芙蓉

越溪曲

越溪春水清見底石罅銀魚搖短尾船頭紫翠動清波
俯看雲山溪水裏誰家越女木蘭橈髻雲垂耳溪風高
采蓮日暮露華重手滴溪水成蒲萄盈盈隔水共誰語
家在越溪溪上住蛾眉新月破黃昏雙櫓如飛翦波去

黯淡灘歌

長灘亂石如疊齒前後行船如附蟻逆湍衝激若登天
性命斯須薄如紙篙者倒挂牽者勞攀崖仆石如猿猱
十步欲進九步落後灘未上前灘遭上灘之難難於上

絕壁雖有孟賁難致力灘名況復呼黯淡過客攢眉增
嘆息下灘之舟如箭飛左旋右折若破圍歡呼踏浪櫂
歌去晴雪灑面風吹衣飛流宛轉亂石隘奔走千峯如
馬快賈客思家一夕還傳語灘神明日賽下灘之易易
如盤走珠瞬目何可停斯須長風破浪快人意朝可走
越暮可吳廼知逆順有如此逆者悲愁順者喜請君聽
我黯淡歌順則流行逆湏止順者不必喜逆者不必愁
人間順逆俱偶爾且得山水從遨遊

征婦怨

有柳切勿栽長亭有女切勿歸
征人長亭楊柳自春色
歲歲年年送行客一朝羽檄風
吹煙征人遠戍居塞邊
鱗鱗車馬去如箭錦衾繡枕難
留戀黃昏寂莫守長門
花落無心理鍼線新愁暗恨人
不知欲語不語顰雙眉
妾身非無淚有淚空自垂雲山
煙水隔吳越望君不見
心愁絕夢魂暗逐蝴蝶飛覺來
羞對窗前月窗前月色
照人寒遲遲鐘鼓夜未闌燈闌
有恨花不結妝臺塵慘

恨班班半生偶得一錦字道是前年戰時苦一朝血杵
烟數除腰間斜挂三珠虎妾心自喜還自驚門前忽聞
凱歌聲錦衣繡服歸故里不思昔日別離情別離之情
幾青草鏡裏容顏為君老黃金白璧買嬌娥洞房只道
新人好

竹枝詞

湖上美人彈玉箏小鷺飛度綠窗櫺沈郎雖病多情在
倦倚屏山不厭聽

郭羅洛納新

京城燕

京城燕子三月盡方至
甫立秋即去有感而作

三月京城寒悄悄燕子初來怯清曉
河堤柳弱冰未消牆角杏花紅萼小
主家簾幕重重垂銜片却向檐間飛
托巢未穩井桐墜翩翩又向天南歸
君不見舊時王謝多樓閣青瑣無塵
卷珠箔海棠花外春雨晴芙蓉葉上
秋霜薄

月湖竹枝詞題四明俞及之竹嶼卷

絲絲楊柳染鵝黃
桃花亂開臨水傍
隔岸誰家好樓閣
燕子一雙飛過牆

水仙廟前秋水清
芙蓉洲上新雨晴
畫船撐著莫近岸
一夜唱歌看月明

梅花一樹大橋邊
白髮老翁來繫船
明朝捕魚愁雪落
半夜推篷起看天

新月行

江南小兒不識愁
新月指作白銀鈎
家人見月更歡喜

卷簾喚我登高樓三年留滯京華裏滾滾黃塵馬頭起
一番見月一番愁歸心夜逐東流水在家不厭賤與貧
出門滿眼多故人誰念天涯遠遊客只有新月能相親

行路難

行路難難行路黃榆蕭蕭白楊暮槍竿嶺上積雪高龍
門峽裏秋濤怒嵯峨虎豹當大關蒼崖壁立登天難千
車朝從赤日發萬馬夜向西風還鑑湖酒船苦不蚤遼
東白鶴歸華表夜雨空堦碧草深落花滿院行人少世

情翻覆如秋雲誓天歆血徒紛紛洛下爭迎蘇季子淮
陰誰識韓將軍行路難難行路白頭總被功名誤高樓
昨夜歌舞人丹旌曉出東門去子午谷終南山青松草
屋相對閒拂衣高歌上絕頂請看人間行路難

塞上曲五首

秋高沙磧地椒稀貂帽狐裘晚出圍射得白狼懸馬上
吹笳夜半月中歸

雜沓羣車百輛多五更衝雪渡灤河當轅老嫗行程慣

倚岸敲冰飲橐駝

雙鬟小女王娟娟自卷氈簾出帳前忽見一枝長十八

折來簪在帽簷邊

長十八
草花名

馬乳新捫玉滿餅沙羊黃鼠割來腥蹋歌盡醉營盤晚
鞭鼓聲中按海青

烏桓城下雨初晴紫菊金蓮漫地生最愛多情白翎雀
一雙飛近馬邊鳴

古鏡篇寄韓與玉

古鏡圓圓似秋水美人當窗正梳洗
芙蓉涼月鬪嬋娟
默默自憐還自喜朝來開匣忽淒然
一痕微雪映華鈿
却恨東風惜桃李年年開傍鏡臺邊
粉黛拭鏡還清澈
佳人薄命空愁絕不如化石在山頭
萬古千年照明月

孔林瑞槐歌

并序

先聖墓林古槐一章枝幹偃蹇膚理若鐫刻篆籀
龍鳳細如絲髮雖善畫者莫能狀其奇巧襲封衍
聖公愈加培植見者咸加敬愛因以紀瑞云

闕里陰陰槐樹古百尺長柯挾風雨密葉蟠空擁翠雲
深根貫石流瓊乳蒼皮皴蝕紋異常天成篆籀分毫芒
游絲縈錯科斗亂雲氣飛動龍鸞翔羸秦書焚士坑僂
幾嘆遺經藏壁屋千年聖道復昭明喜見文章出嘉木
神明元冑嗣上公雨露滋沐深培封清陰如水石壇靜
彈琴樹底歌薰風

射虎行

并序

荅祿將軍世為乃蠻部主歸國朝拜隨穎萬戶平

金有功事載國史其出守信陽射虎之事尤偉曾
孫與權舉進士為祕書郎官與余雅善間言具事
因徵作歌

將軍部曲瀚海東三千鐵騎精且雄久知天命屬真主
奮身來建非常功世祖神謨涵宇宙坐使英雄皆入彀
十年轉戰淮蔡平帳下論功封太守信陽郭外山嵯峨
長林大谷青松多白額於菟踞當道城邊日落無人過
將軍聞之毛髮豎拔劒誓天期殺虎彎弓走馬出東門

傾城來看誇豪武猛虎磨牙當路睥目光睽睽斑尾搖
據鞍一叱雙皆裂烏飛木落風蕭蕭金弰琯弓鐵絲箭
滿月弦開正當面雕翎射沒錦毛摧厓石崩騰腥血濺
萬人歡笑聲震天剖開一鏃當心穿父老持杯馬前拜
祝公眉壽三千年將軍立功期不朽奇事相傳在人口
可憐李廣不封侯却喜將軍今有後承平公子祕書郎
文場百步曾穿楊咫尺風雲看豹變鳴珂曳履登朝堂

新隄謠

并序

近歲河決白茅東北汜濫千餘里始建行都水監
於鄆城以專治之少監蒲從善築隄建祠病民可
念余聞而哀之乃為作歌

黃河決道時有清水先
流至名曰漸水曹濮之

人見此水皆遷
居高丘預避

老人家住黃河邊黃茅縛屋三四椽有牛一具田一頃
藝麻種穀終殘年年來河流失故道墊溺村墟決城堡
人家墳墓無處尋千里放船行樹杪朝廷憂民恐為魚
詔蠲徭役除田租大臣雜議拜都水設官開府臨青徐

分監來時當十月河冰塞川天雨雪調夫十萬築新隄
手足血流肌肉裂監官號令如雷風天寒日短難為功
南村家家賣兒女要與河伯營祠宮陌上逢人相向哭
漸水漫漫及曹濮流離凍餓何足論只恐新隄要重築
昨朝移家上高丘水來不到丘上頭但願皇天念赤子
河清海晏三千秋

劉舍人桃花馬歌

青絲駿馬桃花色翠鞍玉轡黃金勒奚奴牽出不敢騎

道上行人爭愛惜，往時曾遇李將軍。
汗流赤血氣如雲，朝刷黃河暮南粵。
沙場百戰成奇勲，歸來無心伏槽櫪。
頻轡長鳴思奮力，東家白面繡衣郎。
千金買去遊南陌，昨朝校獵向城隅。
萬人爭說天下無，夜歸不怕霸陵尉。
玉鞭醉打蒼頭奴，畫燭銀屏歡徹曙。
一朝金盡賓朋去，可憐驕馬屬誰家。
斷韁猶繫階前樹，君不見西家款段。
三十年青芻滿櫪，菽滿田老翁不識城下路。
騎看射獵南山邊。

羽林行

羽林將軍年十五盤螭玉帶懸金虎黃鷹白犬朝出遊
翠管銀箏夜歌舞珠衣繡帽花滿身鳴騶斧鉞驚路人
東園擊毬誇意氣西街走馬揚飛塵湖南昨夜羽書急
詔趣將軍遠迎敵寶刀鏽澀金甲寒上馬彷徨苦無力
美人牽衣哭向天將軍執別淚如泉安得天河洗兵甲
坐令瀚海無塵煙君不見關西老將多戰謀數奇白髮
不封侯據鞍矍鑠尚可用誰憐射虎南山頭

賣鹽婦

賣鹽婦百結青裙走風雨
雨花灑鹽鹽作鹵背負空筐
淚如縷三日破鐺無粟煮
老姑飢寒更愁苦道旁行人
因問之拭淚吞聲為君語
妾身家本住山東夫家名在
兵籍中荷戈崎嶇戍吳越
妾亦萬里來相從年來海上
風塵起樓船百萬秋濤裏
良人賈勇身先死白骨誰知
填海水前年大兒征饒州
饒州未復軍尚留去年小兒
攻高郵可憐血作淮河流
中原封裝音信絕官倉不開

口糧缺空營木落煙火稀夜雨殘燈泣鳴咽東鄰西舍
夫不歸今年嫁作商人妻繡羅裁衣春日低落花飛絮
愁深閨妾心如水甘貧賤辛苦賣鹽終不怨得錢糴米
供老姑泉下無慚見夫面君不見繡衣使者浙河東采
詩正欲觀民風莫棄吾儂賣鹽婦歸朝先奏明光宮

王沂

春愁曲

花房泣露珠滴紅繡屏金鴨香濛濛鸚鵡喚遲梳洗晚

遊絲撲蝶飛燕嬾蕊粉染黃塗額好赤心莫擘庭前棗
虬鬚公子射麋歸望覺雄心醉中老別起高樓連苑東
鸞絃鳳竹幾春風一自驂騑思故櫪門前芳草年年碧

送春詞

黃金臺下東西道紫燕矜誇銀勒好長溝漾晴晴不盡
碧草迷人人易老樓上迎春又送春邯鄲女兒嬌翠顰
一聲鷓鴣鳳城曙滿眼芳洲生白蘋柔柔繞舍麥如尾
錦雉將雛梅結子為問歸耕海上田何如但索長安米

李將軍行

隴西將軍年少時，雕弓錦帶生光輝。
卷旗夜斫樓蘭帳，赤鞍晝截雙鵬飛。
曾經百餘戰，屢出九重圍。
橫行遼水，上殺敵榆關，歸戍樓。
霧暗烽火滅，沙場雪深救兵絕。
人渴斧冰飲，馬寒抱鞍歇。
漢月凍欲死，北風利如切。
魚腸寶刀斷燕尾，蝥弧裂歸來。
藍田空白首，鐵衣換飲新豐酒。
酒酣射石沒金鏃，夢裏鳴笳雜刁斗。
昔時偏裨皆奏功，侯印佩出甘泉宮。
客來問著塞垣事，時時撚箭送飛

鴻西方太白光
隋地中夜悲歌
增意氣漢家定
起李輕
車未用先誅霸
陵尉

陳旅

車搖搖送方叔高之官

車搖搖薊門路
高麗驕馬不受鞭
方郎得官上車去
薊門南頭盧冰流
燕姬十五居酒樓
彈箏唱歌折楊柳
落日車前勸郎酒
南陌行人往復來
幾人似郎得官回
郎車莫驅傷馬足
車中本載連城玉
車搖搖鄔子洲
賣車

金
卷五
買船載旗鼓晴湖風輕聞櫂謳

趙期頤

折楊柳送方叔高

楊柳青春水生借問行人行未行
雕弓在弣馬騰櫪
家住湓江江上城
柔條好拂江頭路
千縷萬縷牽情緒
馬上郎君新得官
阿誰解使留春住
留春住春欲歸江
南江北柳花飛
柳花飛渡江水遮
莫東風吹不起

方積

潭上花

幽潭太古色上有千樹華
深根溉甘泉衆實結丹砂
食之可長生千秋顏若花
縹緲潭上仙種此遺其家
安期日往來時乘紫雲車

田中爵

家爵不入山野鼠不戀屋
爵來食我苗鼠來食我粟
一日食一斗十日食一斛
斗斛日空虛鼠爵焉得足

七夕詞

織女女有夫牛郎郎有妻可惜不相守夜夜河東望河
西一歲纔一會會合一何稀吾聞河西有田郎可犁雲
中織錦女有機胡不一耕一織長相隨長相隨無別離

吳山高題畫

吳山高吳水深吳水住宅在山陰吳僧更愛山頂好剔
掃白雲種瑤草吳山高何迢迢吳門日夜生春潮吳兒
作船住船裏日日吳門弄潮水

李洞

漢陽郎官湖歌

山翁薄暮醉酒歸杖藜迷却高陽池清風吹花綠陰倒
我笑謂是秋雲移還來貫月查夜過郎官湖崢嶸星斗
入江漢蕩漾槎影如鯨魚九華之真人邀我倒玉壺麒
麟擘脯供行廚依稀仙樂在空際碧山四映寒蟾孤舉
酒酌寒蟾明月下飲嫦娥俱霓裳拂雲錦萬荷露瀉瓊
瑤珠麾幢掩靄羅煙空乃有玉皇所授之王童風前飄
飄曳廣帶對立十二秋夫容清香九曲銀河通真人綠

髮披天風錦袍玉雪照天地口說姓字安南公是公多
逸氣畧與古昔賢豪同時能掃月色延我石室煙蘿中
又言昔同張謂所遊地長嘯一覆丹霞鍾風吹仙樂度
溪去我已醉臥香爐峰

舞姬脫鞵吟應制

吳蠶八繭鴛鴦綺繡擁彩鸞金鳳尾惜時夢斷曉妝慵
滿眼春嬌扶不起侍兒解帶羅襪鬆玉纖微露生春紅
翩翩白練半舒卷筍箨初抽弓樣軟三尺春雲入手輕

一彎新月凌波淺
象牀舞罷嬌無力
鴈沙踏破參差迹
金蓮窄小不堪行
自倚東風玉階立

裴公亭吟

朝遊鴻濛津
暮出天壇東
手把天符書
笑逐黃眉翁
翁行宛若飛
空龍倏爍萬
里生星虹
翻然為我一
揮霍樓觀盡
入青冥中
是中泉石秋
玲瓏泉下禹
穴滄溟通
長林月色散
輕霧潭影下
燭玻璃宮坐
來況值青春
暮一日千蛾
獻歌舞水殿
風翻鳳髓香
濃綠迢迢出
廊廡宮

牆亦有裴公亭溪毛映水連錢青飲酣起舞岸巾嘯太
行落日春冥冥太行西來幾千里我自南來浙江水浙
江潮回不寄君只憶橫空紫煙起岸煙起空氣氤氲不煩
擊石呼將軍我行慷慨謝公去更欲長揖南溟君會稽
山上落花裏扶攜醉入千峰雲

劉致

秋雨吟

濕雲閃光飛不起八尺風漪夜如水仙姝不眠肌骨清

起馭夜涼吹玉笙曲中忽作孤鳳鳴天帝感泣秋雨零
旱龍暍死嗟莫及坐見扶桑落日濕前溪水高龍夜吟
不管西郊老農泣

淮南歌

甓社湖中出明月斯須千山萬山白燭龍馳影不敢眠
淮土風煙黯無色鼉鼉起啼鰵鱖舞荷風驚濤戰南浦
湖天無光湖水立夜半行空洒飛雨東方搖搖天欲曙
畢逋啼老扶桑樹淮天悠悠澹空素老蚌潛輝寂無處

古采蓮曲

長安女兒淑且濃
日日采蓮溪水中
笑插荷花照溪水
韶容欲與花爭紅
溪中荷花深幾許
溪上時時聞笑語
紅酣綠縛不見人
應在荷花更深處
歸時夜涼溪水清
扣舷踏歌蕩漿行
荷花蓋頭花盞鬢
溪上月明潮已平

王瓚

白苧詞

天風吹雲雲亂飛
海波漾日揚清輝
雲飛度嶺日當戶

知是人間春早歸青樓珠箔深幾許樓中美人愁不語
情懷易感時易遷羞見溪頭柳如縷金刀翦就白苧衣
錦書裁就白苧詞碧天無際鴈聲遠此恨綿綿春得知
傳若金

楚漁父渡伍胥辭劍圖歌

江有阻兮路有岐時將迫兮來何遲子弗渡兮我心悲
既渡子兮我何以劍為吁嗟行兮子毋我疑

歸來三曲送李建中

月皎皎兮河漢長黃鵠在天兮招我以翱翔天氣涼兮
夜未央援鳴琴兮託宮商商聲作兮風撼撼歸來兮天
路杳渺不可以終極

月皎皎兮夜既寒白露下兮衣裳單南風一去兮何時
還援鳴琴兮曲再彈曲再彈兮天地為秋歸來兮清都
之上不可以久留

月皎皎兮寒風作猿啾啾兮怨鳴鶴常恐秋遂為冬兮
羣物以蕭索援鳴琴兮忽不樂忽不樂兮思吾土歸來

兮山中之人不可以無父

少年行

長衢若平川輕車馳流波上有都人子明肌艷朝霞芳
塵揚遠風白日耀舞羅少年輕薄兒調笑相經過狎坐
酌美酒日暮酣且歌千金釐一笑豪右焉能加時俗誇
朱顏美女悅春華春華豈不好遲暮當如何

琵琶怨

美人揮哀絃上客歎蛾眉急響多悲思孰知心所之感

昔奉綢繆不言生別離誓將桃李顏結君長相思如何
雙棲翼中路忽乖睽不怨歡會難但恐思愛虧含情冀
回顧中曲多苦辭君子苟不聽賤妾欲何為

猛虎行

長林瑟瑟多悲風猛獸引子戲林中白晝橫行動山谷
周遭十里無麋鹿路暗樵夫畏獨歸行人愁向山家宿
近山日日取牛羊更齧居民橫路旁民要耕田給倉庾
官家得知射殺汝

賦得秋夜長送方叔高二首

秋夜長長如歲長如歲尚可夜涼薄人不能寐羣鴈各
南翔一鳬尚北飛團團素明月流光照我衣當歌正激
烈慷慨送將歸丈夫成名微亦足焉能終夜悲刺促

秋月皎皎夜何長念君客游思故鄉當壚美人惜年芳
長夜起舞歌清商歌清商送急管為君酌美酒請君勿
辭滿夜長迢迢漏未終離思比之何時斷離思長夜猶
短

渾沌石行

九江方叔高得武侯八陣磧中小石於其處白質而黃章狀若鷄子字曰

小渾沌揭藝文為

作渾沌公傳云

渾沌以來不可數萬八千歲生盤古絀緼乃在卷石間
光怪潛通落星渚來從魚腹人盡訝坐念武侯心獨苦
八陣圖成泣鬼神三江石轉凋寒暑蒼波噴浸圓且堅
鷄子結成生理全久當化鳥非為怪大未成羊亦可仙
玉精隱月相照射金液流霞紛繞纏輕清已判中黃外
元氣猶涵太素前英雄事往唯存石天衡地軸今誰識

江上嘗疑霧雨寒坐中歛恐風雷黑摩挲直如見溟滓
位置豈肯同沙礫長路相將拂劒隨天陰勿使精靈得

白苧詞

白苧白白如霜美人玉手親自浣製作春衣宜短長春
衣成有時遠行歸無期願君著衣重愛惜風塵變白能
為黑

憶昔行送雅訥正卿參書南歸參書居閒京師
行中書調廣西選為靜江同知比上其名中書

正奏授高郵時廣西寇盜而參書母老即移家
歸武昌待次遂作此奉送兼問訊江漢故人

憶昔文皇御天厯知君已是青冥客寶氣經年動斗牛
璇光徹夜通奎壁比來蹇剝人所歎況復貧病家多厄
忽聞除書雙及門老親白髮生顏色秦郵近水足杭稻
桂林只今多盜賊待次且食武昌魚攜家不過湘南驛
王祥舊來驅別乘賈誼未久遭前席此時父老怨來遲
他日攀轅會沾臆騏驎那愁九州大鳳皇早恨三山隔

秋浮江漢雲木清夜過淮河月波白新詩屢成知自誦
遠道即見何由得黃鶴樓前遇故人因君為致長相憶
古杉行題陳兵曹所藏李遵道畫靈隱道中二

杉圖

靈隱道中古杉樹上與雲霧相繆輶李侯一見為寫真
霜雪蕭蕭起豪末此杉蒼茫幾百年鬼物扶持人所憐
貞心豈容螻蟻蝕老榦或有蛟龍纏山林萬里那得致
見者皆驚棟梁器暗壁尋常度雨聲晴窗彷彿生秋氣

吾聞大廈衆力持此杉誰能久棄之君不見道邊不材木擁腫百園安所施

東溪行為除州萬戶楊俊卿作

東溪主者楊將軍少年領兵多樹勲心將富貴同流水
身以承平住白雲聞道雲深是溪處扶桑直對門前路
青山左抱日光迴寒瀑西連雨聲注將軍臨溪樂詩酒
沙鷗水鶴相親久螺贏經年綴鼓鼙蠨蛸盡日蒙刁斗
白團羽扇小綸巾閒攜碁局過比鄰舟中有客時尋戴

花底逢人非避秦
人間何所無丘壑
車馬憧憧走城郭
紅葉空藏秋渚幽
綠蘿自傍春巖落
近者征南兵未休
荒村窮谷多懼憂
願移部曲隴殘寇
却向溪邊娛碧流

秋夜曲

草木搖落鴈南飛
文窗皎潔承月輝
淒風入房露沾扉
紅顏含彩垂佩褱
簪金鳴玉揚舞衣
蘭釭對耀照君闈
遠行胡為未言歸

天師張太元祈雪歌

至元二年冬不雪天子夙夜憂黎民官庭擇日詔方士
臺觀通天求百神留侯之孫住龍虎世領祠官列圭組
鳧舄經時謁紫微鳳章半夜飛元武皇天愛民祈可必
臘雪依微應三日望拜還聞在竹宮受釐忽報臨宣室
天地杳默韜元功賜予紛紜恩數隆請和六氣輔元化
常使九州歌歲豐

禾簇簇鄰福所藏勤耕圖

禾簇簇禾簇簇去年缺雨今年足人家耕種少得閒一

春強半田中宿塘上水生禾欲齊春禽愛近落花啼出
入無人看門戶野庭一任人來去有時耕罷亦長吟歸
來不記入村深書編從挂牛角上詩卷閑留桑樹陰田
家小心畏法令常願秋租得餘剩鄰翁昨日到城還聞
說官今有新政民間禁馬不禁牛有牛耕田君莫愁

遠將歸

遠將歸恨歸晚通州河頭有船僱行人將歸不言遠人
家生子少離鄉一生長在父母旁自憐出入無年月北

走京師南走越他人富貴輕貧賤一日金多棄鄉縣小
官祿薄何足為得及父母康強時說著還家客心喜此
身雖貧亦不恥

雙劍圖歌

莫邪干將古神劍得水化作雙龍翔斗間寶氣入江滅
波裏金鱗翻日光道人筆鋒如劍利亦能化龍致神異
黑風颯颯濤欲立白日陰陰雨將至忽然逢之不敢窺
爪甲雲氣常淋漓便愁中夜雷霆怒兩龍乘雲盡飛去

戲效子夜歌體二首

種荷深水中日夜期成藕蓮子逐浮萍風波漂蕩久
織錦望成疋終朝不盈尺誰知方寸間千絲萬絲積

古楊花怨

楊花白如雪無事學高飛莫作浮萍草漂零不肯歸

權歌五首

河中日日水悠悠誰道人心似水流河水灣迴有時合
人心屈曲幾時休

待船日日恨船遲
船頭水聲無斷時
昨夜天清好新月
誰家學得畫蛾眉

攀柳莫攀當路柳
繫船須繫上風船
當路人行無好樹
上風浪小得安眠

去年船裏逢端午
今年船裏又端陽
九節菖蒲本仙藥
如何曲曲似愁腸

寧向泥中棄蓮子
莫向水上種桃花
蓮子出泥終有藕
桃花隨水不還家

用謝元暉入朝曲分韻送馬中丞赴南臺得收
字就用其體

金陵鬱迢遞行旆暖悠悠蘭臺清露集松庭積霑收
白鷺迴修渚朱鳳矯崇丘離離曳清綬曄曄振彤騶
遠甸芳風散神都旭景浮臨軒結沖想還車寧久留

黃清老

古樂府三首

君好錦繡段妾好明月珠錦繡可為服服美令人愚不

如珠夜光可以照讀書

君好春芍藥妾好夏池蓮芍藥多艷色春風迷少年不如蓮有實可以壽君筵

縣縣江上草鬱鬱庭中柯人生不相知有如東逝波食杏猶苦酸食梅當若何衣褐猶苦寒衣葛寒更多豈無千載友肯聽魚樵歌

古意懷仲章貢侍御二首

娉婷二八女絕色妙難畫新妝薄鉛華照影修竹下盛

牛事夫壻錦玉耀精舍雖非伯鸞妻惓然惜春夜琴餘
月當軒默默倚風榭寄語東家兒紅顏莫輕嫁

梧桐生高岡雲氣涵空清南枝挂孤月上有蒼鸞鳴大
匠揮玉斧渾然合天成置之白玉堂被之絃歌聲一彈
松風來再鼓溪月明子期人已往青山為誰情

于欽

巢湖中廟迎神歌

廣開兮龍宮御仙姥兮下鷄籠神靈雨兮先以風雲溶

溶兮漸來東揚朱幢兮建翠旗驂青虬兮從文螭
鷺音兮以下若有人兮開羅帷羅帷淡兮春風儼仙靈兮
在其中集千艘兮鳴鼓疏節歌兮緩舞奠桂酒兮藉蘭
肴折芳馨兮遺遠渚神忻忻兮既安留澤斯民兮受其
嘏

送神歌

駕兩龍兮倚衡捲珠簾兮暮雲平西江兮極浦數峯兮
青青青青兮未極君不少留兮起予太息吹參差兮水

湄送仙姥兮西歸蛾眉颯兮秋霜淡白雲兮莫知所之
自今兮世世俾來者兮願無違

陳德永

鴈蕩吟送秦文學還吳

鴈之蕩兮乃在甌越之野瀛海之堦有萬菡萏鑱青天
東南形勝此其最我嘗著屐周覽於其間厥初宰物孕
雄怪元氣混沌何由穿巨靈運斤鑿鬼竅列缺吐火施
神鞭遂令後爾萬萬古見此錯愕難為言上疑日車解

轡傾側過下恐地軸撓動相鉤牽昨夢尋君拂煙去有
擁芝蓋導我前崩崖旁豁瞰空洞迴谿不定行蜿蜒狂
雷砰訇起何處白龍噴薄飛層巔熊蹲豹擲若怒若啼
霞明霞湧倏閃倏開重重掩掩變化不可以極兮我方
矯首睨立乎雲梯南望海水不滿杯灣環下繞山足來
仰攀玉女駕笑踏飛鸞低羣仙集倒影雜佩中徘徊聳
身直上浩無際海月正挂吹簫臺於焉得深悟扶桑警
天鷄蘧蘧驚覺在枕席但聞落葉如雨風淒淒君來謝

我欲西邁惜此不及窮扶攜我知君身有靈氣世上塵
土何能迷推仁澤物本我事成功歛退真奇哉碧桃花
發俟君到勿使引領雙眉摧

胡杕

元旦詞

昨日去矣今日來時節無乃苦相催去者亦何速來者
亦何促晨風東北來吹我堂前燭昨日何舊今日何新
我將舊酒酌彼新人

美人歎

高樓美人一點雪
翠袖舞若青天月
樓上酒杯乾
樓頭杏花折
綠帶鴛鴦雙
繡結迎郎未幾送
郎別明日新腔
為誰發

高句麗

東人之領如螭螭
落日唱曲過大堤
一曲一傾天下耳
四海齊和高句麗
玉轡雕鞍大宛馬
醉歸繫在垂楊下
深院薔薇春正濃
華燈正照黃金箏

楊鑄

明鏡詞

亭亭青銅鏡似月雲端缺無復照花顏輝光暗消歇憂
來不欲近坐恐生白髮

御選元詩卷五


謹案第三頁前七行又復揚舠向東去刊本舠訛
鈴據陳樵鹿皮子集改


第八頁前二行船尾翠旗風綽綽按天錫集翠作
彩與此異

第二十頁後三行雲氣飛動龍鸞翔刊本氣訛起
據廼賢金臺集改

第三十頁前三行不管西郊老農泣刊本農訛龍
據劉致時中集改

第三十頁後三行溪上時時聞笑語刊本上訛溪
據劉致時中集改





總校官庶吉士臣侍朝

校對官檢討臣蕭九成

謄錄監生臣劉天倉

欽定四庫全書薈要

集部

御選元詩卷六

詳校官原任主事臣
李斯咏



欽定四庫全書薈要卷一萬八千四百十八

集部

御選元詩卷六

樂府歌行五

霍希賢

魏文貞公廟迎神曲

吹簫兮擊鼓具牲牢兮列樽俎風颯颯兮降靈祀我公
兮終千古

送神曲

有酒兮惟清有脂兮惟牲神其醉飽兮旣安且寧風馬
靈車兮還古塋福民田兮消蝗螟如貞觀兮永太平

岑安卿

美人行

錦雲窳地春風輓彩鸞影展烏雲綰繡茸慵理怯餘寒
寶鳧煙斷花陰轉露晞香逕苔蘚肥鳳鞋溼翠行遲遲
憑闌無語何所思默看雙蜨花間飛

古意

亭亭千歲松起自一寸植苟無斤斧患壽可比金石青
青園中草一雨迴故色清霜忽飄零彫悴在頃刻

寶刀不斷水綫溜可穿石君看城門軌要非兩馬力為
學不苦心虛談政何益偉哉大禹功猶思寸陰惜

周權

古樂府

妾有嫁時鏡皎皎無纖滓照妾芳華年塗澤如花美郎
行向天涯歲月忽踰紀空閨生遠愁妾容為誰理妾容

匪金石寧復昔時比重拂故匣看炯炯光不巳人情重
顏色反目如覆水願郎待妾心明與鏡相似

古別離

天河限東西經歲別女牛社燕辭歸鴻亦背春與秋人
生苦離別別多白人頭十年阻江漢音問何沈浮豈惟
腸九迴輪轉日萬周君看江頭水東去無回流君看山
上雲來往任悠悠

牧童詞

我牧不憚遠牧多良苦辛所幸牧已狎馴擾無敗羣平
原溼春煙碧草何披紛大牛隱重坡小牛飲芳津旦出
露未晞及歸景常曛時復扣角歌歌俚全吾真取樂田
野間世事非所聞歌闌臥牛背仰見天際雲

東林行

意行忘遠趣所詣欲登仙絕峽下蒼黑半壁懸銀泉峰
回路不定曳杖聊夤緣延流忽舒曠楮楠影翩聯恬目
霽孤墅洗心翫芳荃永晝無樵斤芳洲愜鷗眠幽迴人

金少卿集卷六
境異似與隱者便巖花映石瀨漁舟起孤煙

相逢吟

客從郢中來抗志青雲表持螯共拍浮江遠孤舟小寒
夜潮氣白楚樹晴烏早酒闌起推篷落月在西島

羸驥行

高秋吹霜沙草衰駟駟牧馬無龍媒伶俜羸驥空伏櫪
長稽短豆隨駑駘筋聳睢高眼如井月冷沙空徒顧影
飈辣長嘶萬里心雄姿困頓無由騁乃知天閑十二屯

如雲龍膺豹股八尺身蹴翻青雲振綠髮金羈照耀皇
都春朝辭天山暮碣石飛電流雲邁無跡風吹欲軋拳
毛騮意氣能傾照夜白短衣奚官霜虬鬚圍養芻粟多
遺餘絕憐羸驥不滿腹翦刷猶可同馳驅我欲進之嗟
遠道神全形枯難自好按圖舉世識驪黃懷哉駿骨秋
風老

次韻褚仲明苦熱行

燭龍銜火飛南陸萬疊雲峰天地窄鯨波沸海泣陽侯

涸盡泉源爍金石人間何處逃
隆暑細葛如裘汗如雨
蒼生隨此深甑中救暍何時命
如縷我欲太華峰頭酌
瓊液醉臥青瑤嘯松月明星邀我
玉井旁共折芙蓉弄
香雪扶搖直上九萬里高揖盧敖
太空裏手攀斗柄睨
塵寰濯足銀河弄秋水

採蓮曲

越溪女郎十五六翠綰香雲雙鳳
蹙嫣然一笑似花妍
豔試新妝照湖綠羅衣露浥紅芳
秋少年陌上情綢繆

蘭橈容與隔花語驚散鴛鴦生晚愁蓮花莫折莖有刺
藕絲易斷針難度清歌一曲入湖煙空載香風滿船去
古琴漆有蛇蚺紋者材之良也道友攜一琴甚
古謂是零陵湘石枯桐斲成索價三百緡無償
之者戲作湘桐吟

黃鍾沉聲喧瓦缶良材入爨知多少誰裁鳴鳳千年枝
蛇蚺龍紋巧蟠紐澤堅古漆光不磨徽絃不具含雲和
已無伯牙之手子期耳三嘆如此湘桐何

雪軒高士以白紵製服作歌戲贈

經冰緯玉紛紛橫三盥寒露方織成
曉機裂下不敢翫一道雪瀑來中庭
天然精潔不可浣犀熏麝染慚吳綾
製成素服輕於雪雅稱仙官錯珮玦
星斗離離夜插椽高興飄飄白銀闕
乘風便鞚紫鸞車瓊簫吹落蓬萊月
鴻門宴

項王高宴鴻門北風雲奔走天為黑
椎牛刺豹酒三行談笑戈矛生頃刻
豈知天命非人謀玉玦三提事何益

興亡漢楚兩干將開闢乾坤雙白璧
喑鳴謾說萬人敵
隆準天人竟誰識
玉斗聲中霸業空
烏江江水還流東
雅勒呼

大堤曲

郎家大堤上妾住橫塘曲
年少結新歡離別豈所欲
日望郎歸門前春草綠
嫁時雙明珠繫妾紅羅襦
纂製
遠遊履願諧比目魚路長不可致
搔首空踟躕

賦得月漉漉送方叔高作尉江南

月漉漉泥在水送君歸幾千里泥在水月不明執君別
難為情漉漉見月水深泥多飄飄遊子歲暮如何洞庭
霜下木落無波白雲在望鼓枻謳歌念子之來攜書一
束茲焉言歸榮養以祿雄劍在匣弨弓在箠馳騁千里
毋爾局蹙

柯九思

和許彥溫宮詞

暖吹生香花半吐三十六宮傳笑語雕闌並倚弄新春

翠袷不管沾微雨小娃相對學笙簧雲母屏風白玉堂
中貴傳宣日將暮不省秋閨斷寸腸

明月歌送僧東遊

上人忤世祇好遊蹠踏空翠凌清秋時人問之寂無語
明月在天惟點頭吳山越嶠皆明月桂影相隨渡東浙
煩師問訊吾故居山近瓊臺瞰雙闕

閨中詞

階前萱草可忘憂底事王孫尚遠遊却笑去年新種竹

錦棚已露竹根頭

物華生意隔湘簾
睡起殘粧思更酣
微笑竟穿花畔去
背人低語折宜男

烏夜啼

故宮芳草春日低
高林漠漠烏夜啼
烏啼不斷愁深閨
萬里封侯安足道
玉顏如花夢中老
東方欲曙烏飛去
門外落花紅不掃

有所思

雲帆何處是天涯
遼海茫茫不見家
況是園林春已暮
有誰明日主殘花

李裕

洛陽路

劉郎騎馬出南陌
陌上桃花迷馬色
夢逐遊絲看春日
一夜東風杏花白
欲歸不歸思故鄉
燕女緩帶雙鴛鴦
明朝別轡向何處
旭日晴煙洛陽路

青青淇園竹

青青淇園竹莫作樂中笛吹出長相思愁人頭髮白

定情篇

願作雲臺鏡團圓誓不虧朝朝綺窗裏相對畫蛾眉

採蓮曲

長歌短棹滿前溪溪上鴛鴦對對飛莫向中流蕩雙槳
水波容易濕人衣

秋千詞

晴光幾日飄遊絲幽窗小影含綠姿衛娘新畫雙蛾淺

笑覓秋千下平苑長繩裊碧垂垂動盤桓寶髻搖金鳳
華纓雜珮迎緒風越羅半曳春煙重紫燕驚飛翠鸞立
行雲欲墜柳花濕盈盈嬌粉膩巾紅暖玉團香春一色
穠芳如夢秦蘅老牆陰榆莢青錢少整衣重起為君壽
海潤河清鎮相守

韓性

曹娥廟歌

承筌橈兮桂舟弭靈旗兮中流望四山兮何所映朝陽

兮上浮玉笄兮瓊珮馭青虬兮雲之外采杜若兮江皋
芳菲菲兮未沫渾不極兮海門餞多景兮江濱吹參差
兮屢舞馳玉軼兮繽紛雷填填兮拊鼓檜陰陰兮靈雨
波渺渺兮安流神樂康兮終古

葉峴

罷穀稅詩三首

我田之臧兮我稼之昌孰冀茲土兮蜃灰孔良東作既
殷兮千艘萬檣稂莠不作兮螟蠹不戕是為土作兮稼

政之常

我田之腴兮我稼之稠孰糞茲土兮蜃灰是優耕者之
利兮征者之年孰諗茲蠹兮不我告猷百年之病兮一
日而瘳

顯允許君兮太岳之裔仁人之言兮除我宿弊太山之
陽兮長川之溼老農舉首兮曷報嘉惠請歌我詩兮貽
於世世

劉詵

古意

南方有佳人天質辭紅粧素手映輕雪明璫照羅裳二
月千花開笑語春風香盈盈水晶簾丹雲貫疏房自倚
絕世姿鬢鬢不能霜秋葉鳴西樓城烏啼夜涼高節良
自固諒不悲年芳

征夫歎

六月征廣徭塗埃千丈高渡水波沸骨登山汗流刀豺
虎攫疲馬荆棘破長橐賊來多如雲石洞穿千整鐵甲

日曬火大旗煙漲濤惡溪塞斷骨亂礫紛流膏前年過
流沙苦寒脫鬚毛風裂壯士胄雪積將軍旄人生莫作
軍寒暑相戰鏖人生莫作軍性命如蓬蒿君王方神武
狐鼠何足憐但願四郊靜微軀敢辭勞

和東坡四時詞

燕子輕寒生院落佳人自卷猩紅幕樓頭風細隨楊花
簾下日長添繡萼纈紋酒暈透瓊肌雙陸初贏笑問誰
閑綰同心當戶立不知花影滿春衣

幕波微皺回廊永酒闌手枕珊瑚冷槐影橫階午簟涼
榴花滿地風簾靜梅酸未試意先顰倦拂琵琶撥未勻
紈扇半閑冰盃凍翠禽兩兩下窺人

餅浸雙頭蓮顆綠畫闌閑却青奴竹微涼半下水晶簾
坐看疎螢度高屋夜靜樓風時動扃隔牆一葉落虛庭
血色鴛羅裁未就月明處處起砧聲

燭暗睡輕聞畫角玉盃脂水紅冰薄深屋無風繡幄垂
小餅一片梅花落轆轤隔屋轉伊啞雲母香猊暈宿霞

報道卷簾寒霧重
午粧纔試翠鈿花

前采薇歌

我不是西山民采薇不粟哀亡殷
又不是周戍卒采薇
禦邊踏霏雪年荒良田三尺塵
甌懸銚冷兒號嗔長鑱
短錐采薇去東家西家相為羣
霜嚴磴滑山路峭月落
鼯啼山鬼嘯曉翻石罅得叢根
共恨土枯根亦瘦寸根
入手如寸金春烹作餅碎勞薪
鹽空菽盡味慘惡空憶
飯甌曾炊銀人言食薇無穀氣
五日十日終亦斃今宵

妻孥暫充腹誰料後來死何地我死願隨行雨仙徧傾
大瓢作豐年薇根滿山人不食天下米斗皆三錢

釋枯林鐵如意歌

枯林天台葉西澗丞相之後
有才氣能詩以畫蘭名世頗

勇俠或不舟渡水蓋隱於浮圖者嘗遊京師
走馬海子上中飛矢流血滿鞞不顧殆歐公
所稱祕演
之儔歟

君不是金谷園中石季倫明珠買妾長安春錦絲幃障
輕一世珊瑚高株碎如塵又不是黃鶴樓邊王處仲萬
騎上流縱馳鞚狂醺千石發浩歌唾壺敲碎天為動君

是天台丞相之嫡孫
胷中八九吞昆侖
少年寶玦落荆棘
再拜禪林依世尊
手持鐵如意
笑傲典午二豪之富貴
良工精髮生碧花
古制蟠螭隱元氣
木杯不用輕大江
蛟鯨辟易馮夷僵
薊門駿馬疾秋鶻
飛箭穿髀心如忘
談經說史似支遁
四座公卿遜高論
古來豪傑多竄託
槁面布衫塵上混
畫蘭千紙生秋風
賦詩萬卷老愈工
承平智策無所用
落魄行遍江湖中
嗟哉爾之如意兮
不願為大梁遊俠之袖
椎寧落為許行耕野之鉏
犂

寶光發匣閭里怪珍重深藏莫輕賣君不見干將莫邪
困豐城化為兩龍飛去延平津利器不識空有神

天馬歌贈炎陵陳所安

所安名泰甲寅以天馬
賦領薦下第頗不遇故

以此
歎之

房精夜隨滎波中驂騑奮出如飛龍昂頭星宮逐枉矢
振鬣雲闕追天風漢家將軍三十六分道出塞爭奇功
當時一躍萬馬盡蹴踏少海霓旌紅韓哀謝輿伯樂去
蹶塊奈此奚官庸十年皁櫪食不飽雖有駿步難爭雄

春隨錦韉北陵北秋臥衰草東阡東時從駑駘飲沙澗
未免泥滓霑風駿夜寒首藉山谷迴長嘶落月天地空
時平文軌明蕩蕩萬里窮荒無虎帳交河不用踏層冰
裹足山城學馴象吾聞天子之廐十二閑驥騄並收無
棄放金根雲罕出都門喚取雍容肅仙仗

秧馬歌

天門龍駒來貳師朝燕暮越千里姿折旋蟻封乃不可
彼固信美非吾宜江南二月秧事急水田千畝肩鴈隨

壁間木馬忽湔沸歛若起廢逢明時背輕腹滑騎不蹶
昂昂首尻過高犂方畦廣畎翠分路意會規矩無差池
平生芻豆了不願獨以筋力充人飢驪黃不形牝牡混
跽齧俱泯兒童嬉東家少年輕稼穡千金市駿窮所之
看花九州誇疾走世路險遠難為期不如田家水土熟
與汝老大長相知借汝襜褕覆塵坌錦韉青絡非汝思

木牛歌

吾聞景升養牛千斤肥椎之不了士卒飢王生號牛八

百里徒瑩蹄角將何為此猶虛名乏實用負任豪末了
不支何如武侯象其似獨化枯槁為神奇平生憂人不
自食餉運常飽千里師刳心俛首竭筋力氣象深穩人
誰疑中多抱負外遲鈍論功猶勝狂犢馳雖無奮勞效
耕種尚以微力裨興衰自期中道可不廢雖有捷徑寧
能趨惜哉清渭不可渡不得束載四海隨我嘗讀書論
成敗魏不足控為吳持江陵蹶羽秭歸歟郢南衰髮秋
風知前謀既輕後過重天意蹉跌長如茲浩歌木牛感

金方田集卷六
豪傑空有遺恨共人詩

憶昔行送李省掾友仁從李龍川平章定寇

憶昔韓退之運籌辨幕擒吳兒蔡城夾道拜丞相歸來
却作平淮碑憶昔于公異槩頭露布從東渭文章功業
相久長一語精神照天地兇姦小大雖不同賓主千載
同高風舳艫白鉞航玉虹勁氣欲剗千崆峒丘夷穴踣
九兕斃溪湮壑倒羣蛟窮莠稂莠盡嘉穀在鉏惡樹善
心元工城門夜開燈火鬧童哇婦織村無哨四郊桑麻

與天平弦誦家家施禮教懸知耆老歌盛德鋹斧春風
餘幼少章江水滿牙旗舞勾陳橫空搥大鼓殺牛擊鮮
勞歸旅千斛鶩黃浮甕醕相君黃扉君紫府先生作詩
如吉甫

萬戶酒歌

泰定乙丑真定吳侯來守廬陵議行
萬戶酒申請垂定郡民預喜賦詩相

賀

城中禁釀五十年目斷吹林江東煙官封始運桑落甕
官隸方載嵇山船務中稅增沽愈貴舉盞可盡官緡千

先生嗜飲終無錢指點青旗但流涎今年忽縱萬戶釀
處處爭說邦侯賢富家遠郭買林田小家盃盞爭濯泉
開城曉避麴車道築室夜甃糟丘磚便將相如舊渴吻
一吸擬盡長鯨川老翁童稚喜欲顛秋醉月下春花前
豐年五穀賤如土市上遊人歌復舞歌復舞邦侯堂有
八袞母共飲蟠桃幾千度春風吹醉九九州公但飲醇
丞相府

織錦歌

南州織錦天下奇
家家女兒上錦機
蓬萊額黃染萬斛
渭川茜紅種千畦
鳳刀冷淬并江水
龍梭細琢炎洲犀
春波雨深淨如練
按紅濯黛隨時變
高鬟半髻玉腕明
心逐輪絲千萬轉
晴漪翠浪舞白鯨
細柳高花穿紫燕
青樓臨道起鞦韆
胡蝶鴛鴦逐少年
月中三郎坐聽曲
海上漢武來求仙
窮年翫歲容髮改
研精極巧造化憐
陌頭楊花春鳥語
東家西家教歌舞
燕姬金捍擁四絃
百萬纏頭棄如土
人生得意各有命
豈無紅顏甘自苦

君不見郭門十里桑柘村
蠶婦朝朝踏風雨

沅州竹枝歌二首

人生結交莫如月
人生行路莫嫌熱
熱當三伏易變秋
月能萬里長隨客

沅人健飯無盤蔬
沅土多熱無難蘇
官船自有龍鳳茗
試寫松風斑鷓鴣

秧老歌三首

效王梅邊體江南農夫插秧上下
田長歌相應和其詞似竹枝而加

淺直

三月四月江南村村插秧無朝昏紅妝少婦荷飯出
白頭老人驅犢奔

五更負秧栽南田黃昏刈麥渡東船我家麥田硬如石
他家秧田青如煙

春寒風雨來滿川牛蓑走遍東西阡郎君騎馬莫問渡
江頭自有官渡船

宋无

枯魚過河泣

北溟有鯢歟薄崑崙氣吞積石摧禹門過河河水枯蹤
跡困泥塗垂涎向海若能濟涓滴無中流有魴鯉不貸
斗升水巨口走噉喙逆遊莫若鮪鯢兮鯢兮爾泣何由
龍伯知決雨津倒天池泝水橫行隨鯢所之揚鰭為謝
魴與鯉還有桃花春漲時

妾薄命

雲母屏珠春冰鮫女織綃蟬翼輕比妾妾薄命比君君
薄情紅綿拭鏡照膽明還疑妾貌非傾城傾城從來有

人妬況復君心不如故故人心尚峯九疑新妾那能無
故時補天天高填海海深不食蓮葍不知妾心

古硯歌

神媧踏雲補天去遺下一團蒼黑天千年萬年乾不得
長帶盤古青紫煙玉工剖天天化石石內星精有餘魄
瑠光發炯成禹壁海王川后輸玄液帝青呵霧坤倪溼
匣月不開太陰泣破天殘缺無人補一穴絲絲漏春雨
空藏老石磨今古補天何時與天語

湖上意

晚過鴛鴦浦無心唱采蓮莫嗔蘭橈急為要趁前船

長相思

昨夜相逢處朦朧春夢中遼西書不到莫是戍遼東

寄衣曲

征衣須早寄遙憶橐砧寒莫訝啼痕少相思淚已乾

江南曲

遙天碧蕩蕩遠草綠恹恹并作相思海春來一樣深

羅噴曲

玉井荷花碧中藏偶意深綠房千萬萼多少可憐心

汪珍

僕射山人山中四時詞

春風破寒入幽谷殘雪消時燒痕綠林花關日媚於頰
野蕨登盤甘勝肉南漪新綠晴滿湖春來行樂何處無
一樽我欲就花飲花下啼禽能勸沽

草泥聒聒吠螻蛄棗花落盡桐陰密舍南舍北掉綠車

山後山前聞打麥新篁解籜來薰風脫巾露坐雙鬢蓬
清泉白石足佳處人世炎炎如甑中

西風蕭蕭羣木槁天外秋雲淨如埽豆葉半枯鴻鴈來
秔稻俱登雞鶩飽白雲夜下天雨霜破籬衰草啼寒蠶
芋魁如盎茭白老牀頭酒熟浮蛆香

千林怒號北風惡堦下紛紛堆敗籜野田日出散牛羊
茅屋天寒喧鳥雀濕雲簷下豆稽灰谷口梅花開未開
明朝積玉深一丈高臥閑門誰復來

陵陽歌

陵陽城頭落日黃
陵陽城下水茫茫
樓中少婦吹羌管
時有北人思故鄉

洪希文

飯牛歌

牛吒吒蹄趵趵枯萁齧盡芳草綠
自晡薄夜不滿腹
擷菜作糜豆作粥
飼飢飲渴兩已足
脫紉解銜就茅屋
不愁飢腸雷轆轤
風簷獨抱牛衣宿
丁男長大牛有犢
明

年添種南山曲

煮土茶歌

論茶自古稱壑源品水無出中濡泉莆中苦茶出土產
鄉味自汲井水煎器新火活清味永且從平地休登仙
王侯第宅闕絕品揣分不到山翁前臨風一啜心自省
此意莫與他人傳

聽琴歌

疎簾曲檻蘋風涼細腰美人藕絲裳神閑意定丰度遠

玉指纖纖彈履霜喬林鶯轉日卓午幽澗泉鳴夜未央
孤鸞別鶴生暗恨母以冰炭置我腸

袁士元

遊東湖醉中歌

青山偃蹇不可呼我行青山如畫圖蕩舟春波並山去
青山盡處橫陂湖周湖一百二十里湖波極處山孤起
下臨滄海上青天南有浮屠抱山址事幽興集天風來
乘風便欲歸蓬萊憂長未釋天地隘眼闊稍覺心顏開

酒酣重踏孤舟發此興平生浩難遏橫山西去復清溝
屠蘇巧構林巖幽園翁翦花春在手蟠迴石磴窮雕鏤
興盡歸來月猶在盤礴解裝春靄靄呼童置酒復徘徊
明月清風如有待臨水軒窗次第開玉山自倒非人推
吁嗟勞生快意少故園茅屋今蒼苔明朝陰晴未可必
攜手重遊定何日借我仙人九節筇直欲拄上太白峯
頭立

李序

遠愁曲

桃杏忽已殘
穠花逐流水
綠堦日色重
芳草青靡靡
飛燕銜落花
春風共吹起
飄散不相知
愁心滿千里

綢繆曲送都彥良

天南翔鴈鳴
雝雝城頭旭
日光瞳矐長
眉公子綢繆客
騎馬乘冰上
南陌馬蹄翩翩
幾千里江漢水
暖遊雙鯉
東風不惜天上
春拂柳吹花為
君喜綺屏桂燭
開洞房
暖紅霏霏明月
香三星綽約正
當戶流輝照見
雙鸞凰

鸞凰不惜雙飛翼天上神仙遠相憶

大堤曲

野塘鷓鴣暖水蕙生桂葉莫上大堤行
拂人飛蛺蝶門前弱柳長紛紛
水花漠漠飛暖雲柔條自有煙露色
不如愁死堤上人劉郎肉薄愁心重
天上離鸞思別鳳春風搖蕩本無根
種得桃花繞新夢

曲江芙蓉歌

綠波天矯如龍尾河漢英英拂雲起
紫雲樓下花映人

搖蕩香風十餘里妖魂照夜春欲語白玉容華舊絲縷
秦川望月錦繡紋桂楫蘭舟鳳簫女紫雲頭上飛鳥過
朱蘭半折空峯我怨紅落粉生微波芳華欲攬愁不歌
雲裳綺袂風露多

章伯亮

行路難

贈君七寶鳳凰之繡柱五色麒麟之錦裳王母九霄觴
中之酒秦女萬縷爐中之香去年紅花今日開昨日紅

金史四庫全書
卷六
顏今日老一生三萬六千日歡日願多愁日少對吳歌
看楚舞歌聲忽忽變今古歸去來莫行路

熊載

岱嶽行

岱宗蒼蒼肇開闢元氣塊圪露鰲脊懸崖峻嶺接穹窿
走澗飛巒堆怪石山形變態苦不常映月雙巖透雪白
雷車飛馬時往來祕府幽都鬼神宅我來已是二月中
滿眼黃塵暗阡陌瓣香再拜懇神祇愧我乏材躬自責

願祈國祚億萬年歲稔時和春拍拍貪婪蠹政掃無蹤
獎掖賢能放邪僻油然膚寸合陰雲甘澍連宵甦地脉
羣峯亂削翠芙蓉列岫橫陳玉圭壁東郊南畝事耕耘
紅是杏桃青是麥九重雨露浥清塵稽首神功手加額
士民歌舞頌昇平盡說宜時好膏澤肩輿今日始登山
路入天門天咫尺崎嶇石磴十八盤玉女神池沁元液
磨崖尚有秦漢碑古體昏訛半摧折唐與晉與封禪壇
雨暗苔侵幾朝夕臥龍蟄起石竅寒元鶴睡足林煙碧

洞天深處何人居紫府神君蓬島客涼風颼颼吹我衣
兩腋頓然生羽翮嗟予不有清淨緣杖履何由脫塵跡
神遊八表醉騎鯨長嘯一聲天地窄君不見日觀峯峯
頭便見東海東曉雞未唱日已出海波燦爛山玲瓏悠
然登覽渺無際齊州九點氤氲中又不見五株松嶙峋
老幹蟠蒼龍異哉斯遊更奇絕野鶴笑我何從容攬衣
掉臂山下去夕陽澹澹煙光濃

吳錫

柳枝詞

風前裊娜傲輕身一日三眠別是春多少
閨情江路上直將青眼送行人

貢九萬

采蓮曲

朝采蓮暮采蓮長歌白苧木蘭船
船頭鴛鴦雙白首也應笑儂別郎久別郎久天一方
南風煖度蓮花香蓮房有子不空房
我儂豈可背尊璋郎不食蓮子不識儂心

苦采得蓮歸日落山獨守空房淚如雨

貢士林

織婦詞

月涼露冷天無河疎星耿耿秋聲和深閨織婦踏機響
軸水捲練騰蛟梭大姑絡緯弄纖玉小姑翦燭顰雙蛾
壁間草蟲促不已鴛幃夢少愁顏多錦成滿箱待裁翦
私券未了官催科終朝勤苦不自給無衣卒歲如寒何
公不見青樓絕豔一曲歌金堆翠積分綺羅

梅頤

四時詞

蕭疎竹樹與簷齊
淺淡桃花隔小溪
絲竹已隨春夢斷
綠陰深處聽鶯啼

松下桃笙酒半醒
石根流水碧泠泠
片雲將雨窗前過
分得新涼入研屏

黃葉蕭蕭獨掩關
屏風小幅畫江山
酒醒夢入湘雲去
不管秋聲在樹間

金
卷六
一曲尊前喚翠娥笑攀琪樹玉枝柯熏籠熾炭矍瑜暖
不覺寒威入夜多

林景英

劍子歌

匣龍夜半忽飛去猛挾水濤還故處芙蓉光斷血花寒
腥魂濕帶天吳淚誰人手挽銀河水神工翦下蚩尤尾
冶金不躍人間靈時聽七星自相語乾坤萬里清塵沙
手持大柄還天家鴻門健舞好麤膽豈信曾經斬白蛇

日出入行

朝出扶桑來暮入虞淵去何不緩馳驅百歲一朝暮

袁正

岳山曉雲歌

大坤溼氣蒸從龍油然勃然連蒼穹曙窗注望東岳峰
須臾不見青芙蓉初疑博山噴出紫雲縷又疑蜃精海
底推起龍王宮東西糢糊總一色上下變幻知幾重既
非芒碭山中隱劉季又非陽臺神女遙相通養文元豹

隱丹壑失巢老鶴迷青松忽見千株萬株老古檜化作
千丈萬丈蒼精龍斷崖滴翠晴灑灑落花細雨春濛濛
金烏欲上海水赤神光盪射生青紅狂飈捲地忽吹盡
依然繡出金屏風奇奇怪怪渺無際且將浩興收拾填
心胃

梅德明

柳枝詞

江上春雲半畫橋扁舟東下夕陽潮離魂何似垂楊柳

飛雪漫空煖不消

陶應雷

長門怨三首

擬摘梅花貼鬢嬌
未曾掠削早無聊
承恩不似金盤雪
得到龍屏煖處消

慚問金輿過鳳池
綠雲斜髻曉粧遲
試陪苻苑尋雙藻
暗卜東皇屬阿誰

風度荷花小殿香
淺沙依舊浴鴛鴦
御書翠扇恩猶在

偏憶金輿夜納涼

桂元

和王守之斷腸曲二首

翩翩白馬垂楊陌
千金結交五陵客
白苧細褶玉繫腰
迎風葉葉衣袖飄
青樓夜夜隈香玉
錦帳殷紅射銀燭
蘭房寂寞鎖窗春
一月不動羅幃塵
昨宵醉歸扶不起
天明又入長安市

桃花夾堤春水滑
棹歌三疊行舟發
行舟去去東復西

幾度桃花二三月花前一別一回老相思日多歡樂少
君重黃金輕別離黃金買得少年時

黃真仲

美人春睡曲

柳絲幾結春風怨一曲瑤箏碧雲斷釵頭蝴蝶夢尋春
寶枕紅嬌玉生汗誰家白苧剪刀聲驚起花間一雙燕
欲追殘緒海茫茫紅雨滿庭春思亂

棹歌為松江漁者李復禮作三首

麻姑山前江接天
女兒浦口好泊船
船頭鷗鷺不相識
飛上釣魚竿上眠

柳花吹雨漫天飛
新婦磯頭夜不歸
寄語彭郎莫相妬
春江處處鰕魚肥

松花壓酒香滿卮
鱸魚作鱠光陸離
船頭打槳弄明月
船尾敲舷謠竹枝

二月十五日草堂張燈宴集分題賦清夜遊曲
鰲山宴罷紅塵隔
璧月猶貪醉春色
笙歌不放彩燈開

更向花朝作元夕水晶簾底珊瑚枝綵虹亂掣金蛇飛
紅渠縮水開瑤洞寶鴨噓雲結繡幃珠宮十六天魔女
手撚天花散香雨玉鈎笑裏暗藏春翠黛愁邊偷換羽
何人截竹吹涼州玉兔飛入銀河流安得箋天乞長夜
夜夜花間作勝遊

周德可

送衣篇

長城萬里飛秋沙弓馬夜驚雪作花龍泉吐光射天地

是妾掩鏡夫辭家此時惜別方壯年年花發園中煙
征鴻無書日苦短牛女夜夜銀河邊萬瓦欲霜楓似綺
親送寒衣數千里匣鸞顧影鳳孤飛山過望夫到湘水
湘水無情漾白波望夫山石浮青螺長途行處意慘愴
誰家嬌女終夜歌衛霍功高猶黷武善馬未歸羝不乳
關河回首路迢迢愁雲西山水南浦夕陽孤館停征輶
一身百慮雙睇交中宵無人語欲絕風吹燭短山月高

李鵬

三尺水劍歌

龍侯手提三尺水，清晨訪吾古獄裏。
直愁雲氣感星辰，滿目寒光素濤起。
元冰凝結搖空青，芙蓉白日生精瑩。
為君拂拭開寶匣，炯若積雪涵疎星。
起看天地雲冥冥，誰其揮叱走六丁。
為擊風雨驅雷霆，蕩滌氛祲萬國寧。
上頭銘字侯所作，辭嚴義正發炳靈。
憐君少年負才氣，每能仗義討不庭。
側身北望空馳情，君不見燕丹夙昔得荆軻。
尊前擊筑揚悲歌，咸陽西入萬狼虎。
白虹貫日

橫秋河英雄事去一朝異奈此古來憂憤多憂憤多向
誰語我有高懷亘千古黃金不用買功名失勢因之虎
為鼠嗚呼腰間寶劍棄如土為爾更歌公莫舞

李宗洌

古隴頭吟

天寒隴水嗚嗚咽夜飲銳兵從此發海風吹人眼欲枯
上隴猶看嶺西月悲笳蕭蕭霜滿天十里一堠烽火連
去年初度彈箏峽今年復引月支泉從軍辛苦事征討

將軍功大殘兵老

吳嵩

古釵歎

何年美人寶釵失深井沉泥污玃璫一朝拾得再揩磨
三回五回看歎息雙鸞匹鳳兩股勻終然汚色難為新
當時光瑩照頭上有似桃李搖青春今人不識古儀狀
寶釵雖好非時樣為君插罷擁髻悲物無貴賤皆隨時

王東

暹國回使歌

并序

暹赤眉遺種天歷初嘗遣使入貢今天子嗣位繼
進金字表章九尾龜一象孔雀鸚鵡各二朝廷以
馬十匹賜其國王授使者武略將軍順昌知州使
者錢唐人江東羅儆作歌僕遂和之

江東先生遠扣門口誦暹國回使歌高秋夜靜客不寐
歌詞激烈聲滂沱東南島夷三百六大者只數暹與倭
暹人云是赤眉種自昔奔竄來海阿先皇在位歷五載

風清孤嶼無揚波方今聖世霑德化繼進壤貢朝鸞和
紫金為泥寫鳳表靈龜神象懸鳴珂彤庭懷遠何所賜
黃驪白駱兼青騶卉裳使者錢唐客能以朔易通南訛
遙授將軍領州牧拜舞兩頰生微渦樓船歸指西洋路
向火夜夜瞻星河金雞啁哳火龍出三山宮闕高嵯峨
番陽驛吏親為說今年回使重經過先生作歌既有以
却念黎獠頻驚吐田橫乘傳嗟已矣徐市求仙胡亦詫
豈如遲國效忠義勲名萬世同不磨

歐陽伯恭

天馬歌

天子仁聖萬國歸天馬來自西海西元雲披身玉兩蹄
高踰六尺脩倍之七度海洋身若飛海左海右雷霆隨
天子曉御慈仁殿天風忽來天馬見龍首鳳臆目如電
不用漢兵三十萬有德有歸四海羨天馬來庶政平天
子仁聖萬國清臣願作歌萬國聽

鎰敬

賦得瀟湘曲送復上人之湖南

瀟湘露白西風起江竹斑斑澧蘭紫
神僧八月遡星河木杯飛渡瀟湘水
瀟湘兩岸遙相望仙人霞裾白霓裳
炯炯吳絲照清浦鳳梭製錦迴龍章
翠管銀箋為誰寫瑤珮蠟珠爛盈把
蘭橈歸來江渚空五兩飄風疾於馬
鷓鴣啼雨蒼梧秋渺渺吳雲天盡頭
翠珉刻得蛟龍字寄逐南鴻湘水流

潘音

有所思

心中有所思
感損雙蛾眉
美人竟長往
使我歎離居
寂寞就孤枕
強睡誰得知
夜深清露重
飛夢欲何之
覺來日遲遲
分照上羅幃
粧臺理雲鬢
種種盡成絲

王守誠

德風歌寄題張使君新亭

春風徘徊入中亭
太守揮絃政事廳
春風融融布德澤
太守能行君子德
君子德比春風春
風年年長崇蘭衆

草偃地青茸茸太平天子治四海鳳凰覽輝下九閔為
君歌德風曲盡情未終有虞當年詠南薰千秋萬歲稱
聖君

蘇天爵

甄處士訪山亭辭

倚高人兮遯肥羗欲淡兮心夷卜居兮何許山隱隱兮
旁圍朝撫兮孤松夕采兮秋菊招白雲兮為賓抱明月
兮同宿展吾樂兮徜徉又何必兮空谷余亦慕兮由巢

家滋水兮滔滔歲晏兮來歸願與子兮同逍遙

宇文公諒

西湖竹枝詞七首

赤欄橋低官柳斜粉牆短短阿誰家
女郎恰抱琵琶出
早有小船來賣花

奴唱吳歌郎扣舷明朝郎去有誰憐
恨殺吳山遮望眼
不見江頭郎去船

斷霞洒洒魚尾紅清唱一聲吳山東
阿奴只在繡簾裏

隔著荷花無路通

湖裏菱青日日多
蘇小門前無客過
今來古往只如此
休說當年賈八哥

湖上交秋風露涼
湖中蓮藕試新嘗
蓮心恰似妾心苦
郎意爭似藕絲長

菱花菱葉間水渼
采蓮入港與郎逢
勸君挾彈休打鴨
鴛鴦飛起杳無踪

孤山山上野煙開
折花傍水傾金杯
總道梅花天下白

祇似渠奴傅粉腮

張翥

北風行

長河風急波浪惡青天晝黃塵漠漠瓠觚渡中舟盡泊
官船捲帆與水爭牽馬毛寒搥不行禿樹挂戛枯蓬驚
夜深風定浪聲死窗光倒搖天在水前伴相呼隨鴈起
帽絮不煖衣生稜老貿獨語愁河冰上閘下閘應感凌
篙師指直失增減明星欲明霜似糝館陶城南鼓紵紵

休洗紅二首

休洗紅洗紅在水新紅換作裳舊紅翻作裏回黃倒
綠無定期世情翻覆君所知

休洗紅洗紅紅減色雖好不如新著時須愛惜阿母嫁
女不擇人雞飛狗走常苦辛

杏葉黃

杏葉黃杏葉黃蝴蝶雙飛來飛來東家牆東家女兒繡
衣裳可憐蝴蝶惜流芳妝鬢無心蘇合香起彈牀上箏

自歌杏葉黃杏葉青時君去鄉坐見黃落思斷腸安得
致之在我旁君不來天繁霜

小遊仙詞八首

清華公子並騎龍直過蓬萊第一峯親見海中城闕好
半栽玉樹半芙蓉

五色煙中玉女窗鳳歌鸞舞一雙雙除是飛瓊方教得
紫簫吹徹不成腔

來不分明去不言紅椒花露溼妝痕巫娥已逐夢魂斷

十二碧峯愁暮猿

月圓羣芬次第開步前紅露下瑤階
携捕偶共真妃博賭得雙頭白燕釵

道人寄我紫邏山時復賣藥來人間
石潭薄晚有龍關滿谷濕雲無路還

五嶽真官立帳前露蕪香靄落瓊筵
夜深醮罷各歸去一一馬聲嘶上天

美人臨水笑相邀自解羅巾擲作橋
同覓雲間仙伴侶

杏花壇上聽吹簫

月帳新開蕊輦過桂花涼露灑天河雙星一夜叙離別
狼籍碧蓮秋露多

紫壇箏篋曲贈善吹者任子中

君不見龜茲樂工能新聲截竹插雲吹月明黃沙磧裏
索駝斷花門山上浮雲生夜深促節轉悲壯只愁崩倒
赤連城石崖劃裂水泉湧海鶻怒戛風力竦賈胡驚起
怨思長都護罷飲精魂動傳之中國久更新任郎妙解

尤絕倫。鏤檀作管如紫玉。連蟬錦囊金作束。等閒未肯
出向人。為我酒邊吹一曲。落花撩亂游絲起。流鶯無言
蛺蝶死。當頭獨發調最高。響來直在青雲裏。頓令陽春
變秋色。佶栗吳霜飛。繞指教坊絃索慘不驕。歌舞堂中
靜如水。古誰得名今莫比。詎數陽陶與闕李。南音北譜
此正繁。含嚼紛紜徒聒耳。我心感慨未易降。已覺滿座
寒攢攢。安得酒船百斛乘。月去數聲吹黑魚。龍江

宮中舞隊歌詞

白玉琯釵燕黃金鑿步蓮簫吹鳳臺女花獻蕊宮仙香
霧團銀燭歌雲撲錦筵請將供奉曲同賀太平年

前出軍

前軍紅衲袍朱絲繫彭排後軍細鎧甲白羽攢鞬韜
車左右馳萬馬擁長街送行動城郭斗酒飲同儕壯士
當報國母為鄉故懷

後出軍

行行鐵兜牟隊隊金駱駝鳴鳴吹銅角來來齊唱歌總

戎面如虎指顧揮琱戈馬蹄無賊壘手筭可填河王師
本無敵安用戰圖多

拾麥吟

大麥黃將上塲田家鏹麥村村忙丈人荷擔來何鄉兒
牽嫗衣婦挈囊汗流赤日如暴尪終朝拾穗不盈筐但
求糠粃充飢腸身不及青樓娼風日不別惟膏粱

成廷珪

春夜曲

芙蓉樓前拜新月
寶鴨微熏透銀葉
吳山楚水送遠遊
不管閨中照離別
誰家玉鉤飛上天
一似連環舊時缺
缺多圓少將奈何
一寸愁腸萬里結
為郎白苧裁春衣
又恐月圓郎未歸

江南曲

吳姬當壚新酒香
翠綃短袂紅羅裳
上盆十千買一斗
三杯五杯來勸郎
落花不解留春住
似欲隨郎渡江去
酒醒一夜怨啼鵑
明日蘭舟泊何處

雪舟歌為王子中賦

王郎不知何許人一舟橫在江之濱風清月霽未肯出
滄洲獨與天為鄰洞庭煙水兩寂寞十年不見君山春
北風三日雪大作掛席張帆以為樂手中鐵笛吹紫皇
身上氅衣如白鶴拍浮滿載百壺酒奚足篷窗供獨酌
剡中隱者毋相疑乃與戴老同襟期更闌酒盡雪未止
趣棹欲返猶遲遲今夕何夕此乘興千載未必無人知
槎山歌為胡雲夫作廣西憲史雲夫家於德安

之槎山累世矣至正十二年秋中臺計事回至
廣陵聞漢上兵後山居亦蕩然已慨然思親而
不可歸馮太守書槎山二字為贈朝夕展翫姑
慰其心因題卷後

淮水源出桐柏山東流入海何時還胡君引水種秋秫
築室正在槎山間槎山青空白日靜胡君意與雲俱閒
漢東一夕風塵起雲亦高飛幾千里山間有家不得歸
却過揚州飲淮水飲之為洗冰雪腸今我不樂思故鄉

驅車明發渡遠道廣海又在天一方思親恨不歸來早
夢中祇說槎山好他年歸隱奉親歡白頭同向槎山老
竹枝歌
道士莊前秋事多東家西家收晚禾船頭把酒對明月
聽打夜塲人唱歌


御選元詩卷六

謹案第五頁前六行誰裁鳴鳳千年枝刊本裁訛
裁據周權此山集改

第七頁前一行翠裕不管沾微雨刊本裕作矜據
柯九思丹丘生藁改

第二十二頁後一行此興平生浩難遏刊本浩訛
活據洪希文書林外集改





總校官庶吉士臣侍朝

校對官檢討臣蕭九成

謄錄監生臣劉天倉